

此 上賜大西洋國士利瑪竇之葬地也。大西洋去中國九萬里，古昔所不通，航海歸義，惟利氏始，視越裳重譯有加焉。其徒龐氏、龍氏、熊氏、陽氏相繼至京師依利氏，天子命大宗伯賓之，大官致廩餼，時復召對究殫，寥廓 親觀其狀貌， 命工圖志焉。

利氏以庚辰圖抵肇慶，既入 都，承 恩二十載。庚戌季春，利氏卒，龐迪錕具奏請葬。少宗伯吳公署部事，言迪錕等願以生死相依，合在比例之外，宜加卹，請牒司徒，檄京兆行所部擇便地高爽弘敞者一區，收其骨，旁恢屋舍，垣其外，為守視，以昭我 聖朝柔遠之惠。 制曰：「可。」

城西二里溝，有故楊璫私創佛舍，地二十畝，築墳象其俗，堂翼、房突、塾个、闌廚，為室二十有八。龐氏率其徒，以時掃護，暇則讀書其中。

當此之時，雖有指南車，安所用之？ 明德不過周遠哉。然余聞周錫越裳指南車，其時巧在 中國；而以予觀于利氏輩所製儀象、晷漏、水車諸器，神窮造化，法盡方圓，濬發巧心，為觀記所未有，然未嘗以巧見。

其學博辯廣大，靡所不格。與之言，弘微淵深，天何以運，地何以處，雲從何興，風從何起，火何以炎，水何以濕，不思而徹，不辭而對，然又不以學見。溫溫恭人，與之交，如酥之潤，入裏而不覺，雖瑣言小諾，必踐如券，斯何人哉。

余猶記幼時讀《論語》，師傅誥說至「子欲居九夷」，心竊疑之。仁聖君子，夫子之夙辭而不處者也，而于此獨儼自居於君子者何？及觀其就鄒子而師焉，而憬然始悟。夫學在四夷猶信，即不可謂無君子。不無君子，則既君子居之矣，而何陋焉？鄒子之徒，夫子之所謂君子也，凡眾人之見小，恆視天下大，而視己于天下之中亦大，猶群虱之處禪也。聖人之見大，恆視天下小，而視己于天之中尤小，是以無不就而問焉。孔子登東山而小魯，登太山而小天下，故能問且學于鄒子。夫無小一國小天下之見者，亦何足與聞利氏之學乎？

利氏稱西泰子，龐稱順陽，熊名三拔，龍名□，陽名瑪諾，其初至韶陽也，余方刺江陵聞之，既余守京兆，尋出撫吳，而葬地為京兆事，不可無記，葬以庚戌某月日，記以乙卯三月朔日。